

少師朱襄毅公督蜀疏草

少師朱襄毅公督蜀疏草卷之

報擒獲巨惡疏

欽差提督軍務巡撫四川等處地方都察院右僉都御史臣朱燾元謹題爲恭報擒獲有名巨惡併收降黨羽以示招徠事六月二十五日據敘馬瀘兵備道副使李仙品塘報據永寧衛舉人胡縵加銜都司僉書胡綬督陣加銜守備王梁塘報本月二十日亥時宋武張令差何法至營報稱已於本月二十日辰時引兵至中等關

口擒獲僞丞相何若海併僞相印一顆又擒假何若海
係遊擊王二當委叅謀生員鄧宗孔指揮羅鳴徐陞階
等至宋武營中認實回報仍令徃彼引宋武張令解何
若海等至營審實卽委守備胡緯指揮周應舉并鄧宗
孔移會劉養鯤同差官起解伏乞研審正律以洩神人
之憤目今賊酋將相體解苗漢心灰幸卽頒餉犒士催
發進剿有功員役速賜旌賞且隨降兵卒一萬旣隸尺
籍便遵法紀乞賜給糧鼓舞用爲前驅等情到道合行
塘報等因據此又據將官劉養鯤塘報六月二十一日

午時據舉人胡纘報稱奢賊僞大將軍宋武并苗將張令張三重等三十餘人奉職等秘計擒僞相國軍師何若海適來合營就於食時張令從坐上先擒若海若海兵羣起宋武卽呼本部兵衝殺若海兵死者千餘人解中途職等卽差何正光等前去護解若海罵詈不屈屢向宋武求放不應及至渡河又差何繼光并燕瑞鳳督渡到職若海自敘貧寒久客京師以詩字篆刻糊口歸苗受奢氏解衣推食之恩國士之報豈忍忘之惟一死而已言訖淚下并言丞相印係水西烏蒙烏撒東川

四裔府共鑄授之約於七月初二日同舉惟鎮雄不與
職等領兵七百餘名用計招降計散賊黨苗地來投者
已四萬餘衆投而未至者尚多酋膽俱喪成擒可計日
而待等因案查先據分巡下川南道叅政王世仁報稱
奢賊僞將秦國俸陳大臣帶兵三十人馬七匹渡江來
降又據劉養鯤等報稱奢賊僞授兵部郎中閔侍孔僞
都司雷應龍帶兵五百名各仗義來降使賊潰敗并招
降苗地兵民五千有餘各路擒斬僞都司黃勝等一百
八十四名顆追賊投水死者不計其數俘獲婦女四十

五口奪獲馬牛盔甲器械甚多又據江安縣知縣陳達道報稱奉令暗抄底蓬斬賊級二顆并計擒僞都司周之才僞指揮李方抹李朝陽解赴本院正法招降二千餘人賊首弟酋遠遁底蓬一帶地方清寧又據合江縣知縣周夢可報稱加銜指揮詹君泰等擒獲首惡僞節度招討周鼎并擒賊首潘啓翔等八十餘名斬僞叅將阿成等一百五十餘級又詹應祿殺賊數十陣前殺傷難解七十四人與生擒各賊俱奉令梟示并奪獲被擄嬭女馬羸器械等項又據瀘州知州馮曾楷報稱分

兵恢復仁懷縣擒獲僞都御史袁昇龍僞總兵郭鼎鉉
斬賊級三顆瀘州納谿合江仁懷四城相繼克復等因
又據推官郭象儀報稱督兵至瀘州將茜草等處賊二
千餘營俱以火攻燒走隨遣兵追殺二十里斬級五十
七顆活拿男子一百零八名婦女三十九口營內搜獲
納谿巡檢司印信一顆僞勅劄付等項并獲盔甲器械
等因隨據叅政王世仁將周鼎轉解到臣面審是實解
發按察司監候一面行道取解郭鼎鉉袁昇龍以備獻
俘已經備由塘報閣部院科訖今據叅政王世仁呈稱

袁昇龍已解下川東道止將郭鼎鉉并擒獲僞都督廖
盛解臣審實監候又據胡縝劉養鯤等擒解何若海到
臣面審若海供係遵義府舊民先年潛入北京以賣篆
刻爲生後見東事孔亟屢赴各衙門條陳不用遂乘催
調之差前在蘭州投入崇明父子條上三策謀圖大事
逆賊從其下策遂據重慶圍省城只是土兵無紀律致
有今日旣不能忠天朝又不能忠大梁成得甚人只有
一死而已夫何恨哉等語又稱寅父子的於七月初二
日祭旗開刀領兵復出寅與水西烏撒等府共鑄銀印

授若海提調五軍都督統領御營兵馬大元帥攝行相
事經國大將軍何及驗解到銀僞印一顆上刻瑞應元
年春王正月吉旦篆文丞相之印又宋武自獻原領僞
勅一道錫鑄僞印一顆篆文大將軍印隨據宋武張令
張三重何法投見乞哀悔罪情願竭力報効擒酋獻功
臣見其情詞懇切且擒獻若海厥功匪細應照賞格先
動餉銀二千兩給宋武等領充軍需并給花紅獎賞仍
各劄授名色副總叅將遊守等官令各統領原兵殺賊
立功以示鼓舞招徠外該臣會同總督川湖雲貴等處

軍務兼理糧餉兼制陝西漢中地方兵部右侍郎都察院右僉都御史張我續看得何若海以逋誅惡裔突構逆謀自稱星宿忿涉世之多違願比黃巢恣殺人以自快始乘催兵入蘭卽以密計唆動逆賊慘毒交遍於西川這三潰敗歸真復以假言挑動各司兵火株連於三省狂悖無天無日殺人盈野盈城檣杌窮奇世所罕見茲仰仗皇上威武一旦就擒酋膽旣寒公憤咸快卽其誓告逆語萬磔猶有餘辜若周鼎郭鼎鉉皆以內地青衿爲酋軍師委以腹心重寄僞授招討總兵惡極罪盈

擢髮難罄袁昇龍廖盛久據仁懷勢若峒虎今皆一併
成擒殆天厭兇殘使之入網至於宋武張令張三重何
法秦國俸陳大臣閔侍孔雷應龍范寵畢應台等或爲
酋總兵驍將或號彼偏裨智囊俱能悔悟俛首乞降宜
開一面姑與維新仍量給名色將領剗付用鼓招徠令
其奮力殺賊用計擒酋若能建立奇功從優敘錄再照
逆酋所恃者若海與周袁郭廖等輩今俱被擒手足已
剪授首之期諒亦不遠矣除將僞印僞勅并何若海周
鼎郭鼎鉉廖盛移解督臣聽候獻俘有功員役通候事

平優敘及催促各路將領等官剋期進剿外爲此具本
謹題請旨天啓二年七月初四日具題奉

會勘催兵科道疏

題爲兩臣奉命催兵奢酋乘隙起釁敬陳兵變顛末仰
祈聖明垂鑒事准兵部咨該兵科等衙門給事中等官
明時舉等奏前事奉聖旨明時舉等奉命募兵反致擾
亂有無激變情由着該部院叅看來說欽此該本部會
同都察院議照四川之變慘毒異常諸臣章奏有謂奢
酋父子素懷異志者有謂糧餉不繼一時激成者又道
路紛紛稱啓釁有因者此皆得之耳聞未經目擊且一
時同事諸臣俱膏賊刃安能起死者於九京而問之其

中有無激變情由事在彼中難以遙度合行四川撫按
嚴加查勘徑自具奏定奪等因題奉聖旨蜀變多因調
募起釁明時舉等着該省撫按官嚴行查勘具奏不得
容隱欽此欽遵備咨到臣謹會同巡按四川監察御史
張論查得科臣明時舉道臣李達誼激遼事身請催兵
入蜀之日意氣甚銳一片熱腸人所共諒前撫臣徐可
求蒞任未幾促之東下黽勉共事分所宜然不意逆酋
久蓄異謀突發大難觀其慘殺之日卽有僞號告示張
掛四城而永寧遵義俱於數日內前後交發則知二臣

實未嘗激也惟是勇於任事而乏長慮却顧之謀急於踐言而少籌咨參酌之雅變出異常衆皆歸咎臣等採據輿論其失有三從來用土兵必用官兵監制二臣獨持議不用漢兵一人不知渾河之戰秦邦屏雖妹嫁石砮實忠州人久在省城練兵又有賊將加周敦吉鄧起龍等督之故皆肯効死非盡土兵之力也乃衆口力爭而固執不已故自建昌建武應募而出者則卻之使返逆賊崇明止發四千又必欲迫之盈萬開門揖盜禍所從來其失一也蜀中自來徵調例無安家二臣忽倡一

兵二十兩之議蓋因敗衄之後人情恇怯非啗以厚利不肯勇往其意甚善然亦當度蜀之力量能辦與否及部檄減定十七兩計兵三萬需餉五十四萬雖有發帑之旨譬之畫餅人不肯信乃欲以一月內盡皆應手以致撻那捐借處處懸磬逆酋覘知空虛其謀益決公家未受其益而桑梓先罹其害其失二也逆賊所與謀議多係內地之人二臣曾遣材官赴永寧催促其不軌光景諒已萌芽卽渝城一隅犬羊叢集肆彼野心豈知國法自宜蚤爲體察以防意外乃明不炳於幾先身獨脫

於虎口何以謝死者於地下其失三也至於僞扮撫臣
之肘鎖揚言土宇之刺面皆構賊奸人造成套局以混
聽聞與二臣實不相涉天抵慷慨任事之人多少雍容
集思之度不幸而身與變會遂滋多口顧其身爲皇上
耳目之臣目擊東方潰決之勢苟利社稷唯力是視意
外之變原難逆料求全之毀實有可原臣等不敢曲庇
亦不敢枉其實也伏乞勅下部院再加查勘覆請定奪
除明時舉等見今奉旨逮問應聽按臣起解外爲此具
本謹題請旨天啓二年七月初四日具題奉聖旨該部

院知道

優恤殉難諸臣疏

題爲備述文武殉難諸臣仰祈優恤以慰忠魂事逆苗之敢於造難皆因倉卒無備才勇之士有技莫施故一時披靡相率奔逃而其間抗節仗義視死若飴者亦復不少如興文知縣張振德之一家盛服赴火自焚南溪知縣王碩輔之城陷自盡被賊支解桐梓知縣洪維翰之誼不受辱甘心隕首灌縣知縣左重之提兵血戰身膏原野已經前疏題明尚有死事文武并鄉紳舉監等項及今事定各道府始陸續報到謹將各殉難之狀據

實爲皇上陳之當逆賊發難渝城長驅入省臣發成都
前衛指揮瞿英同鎮西所百戶袁中繡材官雷安庶領
兵於龍泉山外禦賊各官以衆寡不敵血戰一日俱歿
於陣成都後衛指揮韓應泰督兵援省遇賊於草堂寺
對敵而死小河所鎮撫都聯芳於省城西門出戰中標
身死茂州衛百戶張羽百總邊一禮各領兵援省至郫
縣與賊戰死郫縣訓導趙愷於本縣西門外禦賊而死
材官楊應評於瀘州小市廂與賊戰死成都生員周清
儒率兵守城被飛石擊死建武所掌印敘南衛指揮李

世勲以城陷挈妻赴火而死典文縣署印教諭劉希文履任半年被賊陷城大罵不屈夫妻殞命子媳皆爲賊擄僅遺七歲幼孫劉江奇爲家僕背負走脫合州鄉官原任涼州屯兵同知董盡倫倡舉義兵保全州城仍督兵至重慶中途爲伏賊刺死富順縣舉人聶繩昌召集鄉勇禦賊戰死瀘州監生吳長齡自率督兵恢復瀘州後中賊伏父子俱戰死典文鄉官原任湖廣龍陽縣丞胡夔被賊綁擄不屈而死以上諸臣如張振德王碩輔洪維翰左重或從容就義或慷慨捐軀睢陽常山未

可專美而武弁李世勳亦能挈家守節不憚捐軀疾風
板蕩乃見忠良至於鄉官董盡倫以悠游林臯之人一
聞賊警毅然而出倡集義勇全城死難凜凜正氣雖死
猶生教諭劉希文以寒氈而罹此大難僅遺笄獨幼孫
聶繩昌以初舉孝廉與吳長齡各挺身禦侮雅有烈士
之風未遂吞賊之志均應厚加褒贈用示勸酬伏乞勅
下該部覆議上請將張振德王碩輔洪維翰左重董盡
倫李世勳劉希文各從優褒卹仍建祠崇祀瞿英韓應
泰趙愷都聯芳袁中繡張羽雷安庶楊應評邊一禮各

照例甄別卹錄聶繩昌吳長齡周清儒各贈以應得職銜胡一夔准入鄉賢崇祀行臣遵照施行臣無任仰祈待命之至爲此具本謹題請旨天啓二年七月初四日具題奉聖旨該部知道該兵部准禮部咨覆奉聖旨張振德准贈光祿寺卿廕一子錦衣衛正千戶世襲僕顧美等優卹俱依議該部知道又該兵部於南科歐陽調律等疏覆奉聖旨董盡倫保城殉難義烈有功准贈光祿寺少卿廕一子外衛正千戶世襲仍立祠歲祀又該禮部覆行四川巡撫衙門轉行所屬建立祠宇春秋致

祭奉聖旨是

議處袁庸府佐疏

題爲議處袁庸府佐以肅邊防事爲照叙南接壤蘭苗而建武一所扼萬山之險當六縣之衝不惟叙府係以安危寶川南倚爲屏蔽自逆酋狂逞攻鬪半年恢復之後設壞不堪卽得精明強幹之材加意調繆未易就理乃袁庸如安邊同知辜志會伎倆已窮議論叢集欲令覷顏就列而勢有必不可者臣謹會同巡按四川監察御史張論據實爲皇上陳之本官性本昏庸年復衰邁居常猶可尸位應變大致乖方錢糧任庫吏之作奸漫

無稽核刑名由主文之提掇一味糊塗建武缺餉萬餘
盡被侵那何以塞守將龔萬祿之口南溪取銀二百茫
無下落祇以飽奸胥陳志義之囊其署府也旣滿城括
借以資城守矣乃各縣解到安邊餉銀四千兩何以復
散守城之兵致令邊兵嚼菜爲命一日三告視如秦越
竟致潰陷誰之咎乎其交代也速赴信地猶日晚矣乃
非謂戍城之側寸步不前叙瀘李副使嚴檄督之纔一
渡江卽刻旋返畏賊如虎抑何怯乎尤可異者本官因
前歲議處安劾良之事與逆賊父子盤桓日久故前撫

臣令親入永寧催督赴援乃逆賊崇明既出復返曾不覺其造逆之謀迨至渝城與樊龍等聯舟河下又不發其將叛之狀一旦文武大小諸臣竝遭奇慘而本官獨無恙脫歸之日自稱身在屍下既死復甦及據所聞身無寸傷雖有長喙何解群疑參照州府安邊同知辜志會碌碌無奇昏昏若夢苗方同處既失覺於幾先大難偷生更負慙於地下責以綢繆則一籌莫展律以官守且五印俱棄卽無俛首乞哀之事亦愧昔人同日之誼幸逃一死宜用三褫所當照不謹例革職閑住者也

伏乞勅下吏部再加查訪如果臣等所言不謬將辜志
會革職閑住遺下員缺卽以原陞同知王國治頂補庶
不肖知懲而疆圉有賴矣爲此具本謹題請旨天啓二
年七月初四日具題奉聖旨吏部知道該本部覆奉聖
旨是

塘報遵義兵克金刀坑

爲塘報賊情事七月初二日據分守川東帶管遵義道
布政司叅政吳國仕呈據遵義府署印本府推官馮鳳
雛呈准都司陳一龍手本報稱五月二十一日同真安
州土判官駱麟并加銜千戶劉朝官等陸路發兵攻剿
蘭賊扶國禎趙國璽等彼賊屯劄金刀坑絡繹一十三
營於二十二日大戰分布各兵直抵賊營本官奮勇衝
鋒當陣斬獲賊級三百餘顆逆賊大敗追殺重傷墜岩
投河者數千得獲器械馬甲絮被糧食無筭又獲黃傘

三把僭號榜文告示牒劄十張又據駱麟報稱同日督兵合攻親斬逆賊猶朝良首級一顆各兵奮殺逆賊數百賊方大潰各營一齊發喊大殺燒燬賊營一十三所共斬苗級十一顆得獲大旗一面大馬一匹花槍三枝衣甲馬絮九件彩畫金鼓旗黃傘等項百十餘件又據加銜千戶劉朝賓守備屈朝宣百戶徐教二等各統兵於本日與賊對敵殺死賊兵數千將賊營盡燬各等情到職除犒賞外看得遵義以葺爾僻壤而楊酋舊種觀爨伺動旋撲旋生自去秋迄今一荼毒於扶賊之竊據

再蹂躪於水西之恐喝以故安鑾猶朝柄趙國璽等屯
劄金刀坑距府城三十里而近或輕師以誘我或伏兵
以疑我直欲吞此一塊土爲渝城作援引壯聲勢耳今
幸師出有功賊首扶國禎着箭趙國璽中槍從來拒堵
據傳云有若此之盛者等因到道又據真安州申報相
同該本道看得逆賊扶國禎等屯兵金刀坑虎視遵義
無非欲踞此土壯藺聲援耳今渝酋蕩掃我武維揚而
遵管官兵鼓銳衝鋒斬級三百餘顆追擊墜岩溺水而
死者不計其數賊黨魚驚鳥散可謂奇捷等因詳報到

職案照先據報稱扶賊屯兵近府已經行令各將領嚴
加防剿去後今據前因該職會同總督川湖雲貴等處
軍務兼理糧餉兵部右侍郎兼都察院右僉都御史張
我續看得藺賊糾合西苗住兵金刀坑睥睨遵義久矣
乃官兵奮勇驅剿斬級三百有餘墜溺死者無筭且首
惡扶國禎等各帶傷逃竄營壘盡焚真足以振軍聲而
喪賊膽除有功員役候事平優敘及批行道將嚴加防
禦并催仁懷等路官兵剋期會合進剿外合先塘報天

啓二年七月

日

優卹江門失陣文武疏

題爲逆賊糾衆在逞將官血戰捐軀乞賜遴選大帥以圖戡定併懇優卹陣亡文武官員以慰忠魂以昭激勸事七月十六日據敘馬瀘兵備道副使李仙品呈稱本月十二日午時據總鎮標下隨征加銜都司丞承芳加銜守備羅明書辦李枝榮等呈稱各員役隨楊總鎮出師於六月十五日敘府起行十九日到納谿安置官兵畢本日卽抵瀘州點發合江仁懷官兵後二十九日復至納谿通行諸路將領約於本月初四日發兵限初十

日巳時抵永寧會兵搗巢楊總鎮於初四日自納谿起
行至初八日到江門安劄營壘初九日晚哨見奢賊數
萬四山埋伏初十日黎明時分奢賊五路出兵各營卽
出奇兵令坐營都司趙光啓督陣與賊對敵自卯至午
交戰數百合殺賊百餘力竭兵疲彼衆我寡官兵火器
弓矢盡絕其標營將領吳民望王成功張子偉馬繩祖
李宗顏楊柱黃金王朝舉等隨楊總鎮奮勇衝殺賊勢
衆多難以抵當營內各官力勸楊總鎮上馬回營再整
兵馬比總鎮堅執不肯旣爲大將必當以死血戰今若

遁去貽笑於酋喚李承芳羅明胡榮葉瑞鳳李枝榮親
丁楊之桂先行護印出營楊總鎮復提大兵率領坐營
趙光啓加銜僉書焦之桐及從征將士與賊對敵惡戰
身死等情又據郭忠郭勤係順慶府同知郭象儀家丁
訴稱蟻主自去年十月奉文調兵恢復漢郾解省會圍
困攻取瀘州至今年七月初二日奉文初四日出師初
八日抵江門蟻主率杆兵劄營畢至初九日申時賊至
與蟻主對山劄營二十餘處蟻主差塘報稟楊總鎮發
銃手五十名應援當蒙分付明早來營議兵至次日寅

時賊出五路攻打杆營自寅至辰殺賊百餘不退賊見各營官兵力竭難支重圍蟻主挺身交戰手刃數賊身亡隨征桐梓縣典史黃起鳴親識書吏家丁并保寧千戶所指揮徐永武俱亦陣亡等情又據利州衛正千戶應襲楊振先家丁劉二訴稱家主楊振先督兵與焦之桐於江門與賊對敵當時陣亡又據敘南衛指揮同知尹似康家丁尹產學訴稱家主尹似康領兵恢復江安等縣今又隨總鎮進征不意江門被賊圍困家主舍死力戰身帶重傷當死於陣又據富順縣鄉官宋柱國家

丁宋璉訴稱家主宋鄉官隨楊總鎮叅謀擒剿逆賊同
於江門陣亡乞賜轉達優卹等情又准僉書加銜副將
鄧懋官移稱江門之役楊總鎮傳令初九日五鼓發兵
劄管永安驛初十日兵抵永寧城下本日未時奢賊卽
到官兵各營對劄楊總鎮令職堵截本職連夜安塘埋
臥初十日五鼓將兵分布已定黎明賊兵一枝攻杆兵
三枝攻本職楊總鎮差旗牌任國海督李縉兵應援本
職又差加銜守備楊成功督陣比時銃兵阿天打死賊
兵二人賊兵四至攻圍職卽撤千總譚有時接應賊死

拒不退職後軍與賊亦殊死戰未幾標營前排柵已被賊毀職只得將本部兵士令領兵官督住在後星夜趕到納谿請令十一日天明楊總鎮尚未見下落等因該本道看得奢賊造反全蜀流毒今省圍雖解渝城雖下敘南雖復而逆酋父子尚在巢穴元兇一日不得國法一日未正公憤一日未洩禍胎一日未了楊總鎮奉命討賊郭同知蒙委監軍業已會期訂盟安得逗遛觀望剋期進師未爲激也不意狡賊有備我兵未齊纔至江門便遇狂鋒若肯偷生何難脫身哉乃楊總鎮從容就

義甘死鋒鏑之下同知郭象儀殺身成仁委棄刀鋸之
中真是英雄正氣不愧鬚眉男子宜加優卹以慰忠魂
從總鎮戰死者如坐營都司趙光啓加銜叅將吳民望
遊擊王成功中軍馬繩祖李宗顏旗鼓張子偉加銜都
司焦之桐加銜守備王朝舉黃金楊柱敘南衛指揮同
知尹似康利州衛千戶應襲楊振先叅謀宋柱國從同
知戰死者加銜遊擊徐永武典史黃起鳴剖赤心以報
國蹈白刃而爲主錚錚鐵漢烈烈忠臣亦當併卹者也
鄧副將全師而歸似應免議譚大孝兵敗而逃法當處

分等因通詳到臣隨據該道稟稱倉卒聞變未有確信及總鎮同知家丁至始問明白總鎮欲踐初十日聚齊之信未發塘報輒自深入且劄營隔絕奢賊突至初攻白杆營頃刻而潰譚大孝遂先逃走再攻標營推倒柵欄一齊擁入官兵俱潰爬山涉水各自逃命總兵自知不敵遂喚都司李承芳親丁李之榮等曰我只想拏住逆酋爲國盡忠不想落在圈套時勢至此有死而已你們忌將印信護出各官兵跪勸上馬總鎮叱之曰人只死一遭耳那裏死兩遭又督兵復與賊戰竟至陣亡郭

同知走出營來親自督陣被賊殺死從征趙光啓等各亦陣亡其餘家丁小兵未開的數容查明另報聞賊劄營明塘密邇江安咫尺納谿職隨帶官兵不滿三百而敗兵全不足恃幸杜將軍將抵瀘陽朱指揮建南之卒五百已到亦可衝鋒其得精兵二萬職當督率深入爲國雪恥爲友報讎卽褻革無恨其總鎮印信欲行齎繳恐途次疎虞職暫收藏此時收拾人心約束兵士全在大將代庖不可一日無人或委鄧將暫署或行杜將兼管等因臣行建昌選取將官及行馬湖忠萬等處調兵

以益防剿并行該道副使李仙品暫署總兵印務料理
殘兵督同鄧懋官等防禦仍檄各路將領劄住隘口相
機進取外該臣會同總督川湖雲貴等處軍務兼理糧
餉兼制陝西漢中地方兵部右侍郎兼都察院右僉都
御史張我續看得逆賊奢崇明父子久稽天討者向以
重慶之賊嬰城未下遂致顧彼失此今渝瀘建武旣以
廓清賊之黨羽日漸星散賊自度勢迫乃賄結鄰司調
出生苗陽言走險實則暗伏屢據探報逆寅父子欲拚
死殺出如勝則長驅入省如不勝則甘心投江斷不效

楊應龍自死於巢臣等僉議既聚十萬之衆已成騎虎之勢我兵不入賊必突出曠日持久餉益不敷不得不四路逼進以伐彼先出之謀總兵楊愈懋屢勝輕敵慨然以滅賊爲任六月十二日自敘府發兵至七月初四日督發各將分路竝進自統加銜叅將譚大孝等兵二萬直抵江門原委順慶府同知郭象儀隨營監紀又延原任鞏昌府同知宋柱國充爲叅謀臣每每貽書酋當攫啄之時宜防埋伏之奸及擒何若海到臣面審若海吐稱奢寅父子糾合水西烏撒等府於七月初二日祭

旗開刀領兵復出臣又檄行戒嚴各路將領去後乃總
兵楊愈懋據險安營身處絕地逆賊探的情形擁衆截
橋四路攻圍彼旣以逸待勞拚死衝殺而我兵又據狹
隘之地彼此不能相顧始雖斬殺相當後則漸不能支
遂致挫衄有損國威顧總兵楊愈懋同知郭象儀身任
疆圉獨當危險揮三尺以殉難誓九死而全忠白骨雖
委諸荒原赤膽常懸於皎日况楊愈懋之恢復長寧江
安郭象儀之血戰解圍其功勞尤昭昭在人耳目不容
泯滅者委應從優贈廕以慰忠魂從征而死者如鄉官

同知宋柱國坐營官趙光啓併領兵官吳民望王成功
馬繩祖李宗顏張子偉焦之桐王朝舉黃金楊柱尹似
康楊振先徐永武黃起鳴一十五員皆致身軍旅隕首
疆場均無忝於累革宜懋膺夫殊恩加銜叅將譚大孝
曾有復郾漢解省圍之功乃兵敗先逝不顧主帥與鄧
懋官等俱候另議外其餘陣亡兵士客臣等查明徑自
給恤家屬至於大將乃三軍司命一日不可乏人雖總
兵杜文煥將到瀘州勁敵在前恐非一將所能支撐者
伏乞勅下兵部速爲遴選有威望智謀大將一員勒限

前來剿賊仍將楊愈懋郭象儀覆議上請從優贈磨各
建祠祀宋柱國趙光啓等一十五員各照例甄別卹錄
行臣等轉行遵照施行臣無任悚息待命之至爲此具
本謹題請旨天啓二年七月十八日具題奉聖旨兵部

知道

二次陳告疏

奏爲治兵無狀乞恩放逐以安愚分事臣本疎庸不諳軍務適承賊變濫叨重寄百日被圍三月迎敵皆仰賴皇上寵靈併各將士之力驅除逆賊遁歸巢穴臣雖下愚豈不知撫恤瘡痍休養士卒待有全力一舉而殲之但賊結連各苗騷動數省近者黔兵屢勝安酋之相結益深苗黨懼禍羣邪之協謀叵測且內地亡賴好亂者衆報警之文一日數至當三空四盡之時欲撤兵而兵不可撤欲坐食而食益不支故共議進兵而總兵楊愈

懋剋定期日銳志前驅本圖手縛元兇豈意身膏原野
此皆臣行能淺薄籌策乖違智不足以料敵才不足以
臨戎折將損威何所逃罪臣自正月以來痰火劇發委
頓不支具疏控陳接奉明旨朱爕元濟變奏功該省倚
賴方切着用心任事不准請告該部知道欽此臣感激
天恩誓圖捐糜而自審力量不堪病勢日進一身爲細
全蜀爲大正擬再疏陳乞而適當進剿未敢遽請不意
遂有此失臣之誤國有顯狀矣執以明章首當正法謹
席榮以待儻蒙皇上憐念微勞特寬刑罰恩賜放逐臣

之幸也非臣所敢妄邀也臣不勝悚息待命之至爲此
具本謹具奏聞伏候勅旨天啓二年七月十八日具題
奉聖旨朱燮元守城討賊有功今總兵官失事著益用
心料理防剿不得引咎求去該部知道

就近陞補州正疏

題爲就近陞補衝要州官以濟時艱事據四川布政司分守川東道叅政吳國仕呈奉臣憲牌照得涪州設居要地乃酉石二土司出入咽喉寔重慶屏蔽近據該道稟稱新陞知州馮玄鑑抱病不克赴任則蜀東重鎮州官何可久缺仰道卽於見任有司中查擇才守竝著資俸相應者定擬一員詳報以憑會題施行奉此案照先據大寧縣典史王民順申稱本縣知縣田弘甸接得邸報陞補涪州知州今本官因患痰疾調治不愈於本年

五月二十八日病故緣由到道該本道叅政吳國仕會同兵巡上川東道副使徐如珂兵巡下川東道僉事戴君恩查得雲陽縣知縣朱毅臣曾經正薦近已報滿堪膺涪州之寄仰懇會疏題補等因呈詳到臣除批行外爲照涪州水陸交衝爲諸土司出入門戶素稱繁重自逆賊叛亂士民驚散環堵蕭條兼以漢土官兵往來繹騷地方疲困已極一切戎馬錢糧及刑名驛站諸務絲棼蠟集全賴正官撫綏料理乃先補知州馮玄鑑抱病不能赴任近又報大寧知縣田弘甸陞補該州不虞本

官病久未痊在縣身故則該州正官必須得人勢難稍緩若待銓推命下動經半載此何等時而可久使之缺人廢事耶臣謹會同總督川湖雲貴等處軍務兼理糧餉兼制陝西漢中地方兵部右侍郎兼都察院右僉都御史張我續巡按四川監察御史張論看得雲陽縣知縣朱毅臣才周四應守慎一塵驥足已試康莊犀利何難盤錯且本官資俸相應曾登薦剡既經三道會詳前來委堪陞補前缺相應題請伏乞勅下吏部再加查議如果臣等所言不謬將知縣朱毅臣陞補涪州知州庶

要地得人而戎務民瘼胥有攸賴矣爲此具本謹題請
旨天啓二年七月十八日具題奉聖旨吏部知道該本
部覆奉聖旨是

三次請告疏

奏爲賊謀日狡臣病滋深乞恩放逐以安愚分事臣聞
鞠躬盡瘁不避艱險固臣子之職分而審已量力以求
無悞封疆尤義之所當裁也臣疎庸淺陋不諳軍旅又
不幸徇馬之病適與時會自春以來痰火暴發動輒暈
絕然療以醫藥猶可扶掖視事今則四肢不仁飲食罔
進忽於八月初七日痰中倒地踰時方醒見今手足不
能動履已成殘廢延醫李榮先等診視俱謂非謝事調
養必無生理而臣所處非其地矣今賊如困獸恣意衝

突且勾連水西各苗狂逞日甚兵將既遭損折糧餉又苦不敷自非精明強幹身先士卒者料理其間必難完局而臣雖有區區之意其奈病體日沉舉止狼狽何封疆大事非可兒戲臣卽旦暮溘死九牛亡一毛何所損益但以病軀悞事致醜顛復爾跳梁卽百身何以自贖情窮勢迫輒敢呼天伏祈皇上垂念危疆急在得人臣病委非假託勅下部院將臣放免亟選才望速代俾臣得一見衰親獲正首丘雖死之日猶生之年臣不勝迫切仰懇之至爲此具本謹具奏聞伏候勅旨天啓二年

八月十一日具題奉聖旨先燮元勤勞茂著方晉新銜
何遽請告還著用心治兵圖賊務期底定毋得再陳該
部知道

改任州官疏

題爲劇郡殘破已極州官抱病難支乞賜就近改任賢能料理以起彫劫事切照瀘州設居水陸要衝爲滇黔襟喉蘭酋門戶錢穀刑名甲於川省姦宄如林紛囂百出官其地者未易治理去歲知州馮曾楷履任方新刻意振刷詎意逆酋造亂首先豕突本官勢不能支兼有肘腋之變遂倉卒先奔僅保印信臣查有司功罪時本官情願誓死殺賊以圖自贖因念變生叵測一面參題聽勘一面令其立功蓋欲彰使過之仁而與其奮力圖

報也及賊復狂逞屯營於該州茜草等處本官雖無禦敵之籌頗得招徠之法正望其救死扶傷從頭整頓而忽以病稱矣當進兵之際一切兵馬糧糗軍火器具悉由此轉輸入營雖各承委有人而夫馬應酬安置料理亦豈得以膜外視之此時此地卽精敏幹濟之才尚恐力有不逮而可以卧病之官泄泄從事乎此一臣者文章節槩居然大雅而戡亂應變實非所長應令卸事聽勘別選賢能料理庶可望其維新臣謹會同總督川湖雲貴等處軍務兼理糧餉兼制陝西漢中地方兵部右

侍郎兼都察院右僉都御史張我續巡按四川監察御史張論查得射洪縣知縣加陞潼川州知州仍管縣事王新民壯年偉度銳志姱修請纓雅比終軍作檄無慙司馬應將本官就近改補瀘州知州責令應酬軍旅撫輯殘黎比常倍加調停殫心愛養務使庶政聿新時艱克濟事寧之日從優叙錄伏乞勅下吏部再加查議覆請將馮曾欉行令卸事聽勘俟事平另議定奪王新民改補瀘州卽令到任管事遺下射洪知縣員缺亦乞速爲銓補庶人地相宜而軍興有賴矣爲此具本謹題請

旨天啓二年八月十一日具題奉聖旨吏部知道該本部覆奉聖旨是

改用縣令疏

題爲軍事需人正急乞賜改用能官以資籌畫事據分
巡川北道右叅政兼僉事閔夢得呈稱本道蒙委監紀
軍務會剿逆酋仰仗威靈稟授方略盪平可指日待矣
竊思搗巢之役大約以離間賊黨招納降民不妄殺一
人而專主擒拏逆酋父子方爲上策誠得洞知彼中地
利人情更利害切身者與之私籌熟計設間用奇實事
半而功倍也查有原任陝西岐山縣令調江西石城縣
知縣趙民戴者由貴州永寧衛學出身田園墳墓俱在

於彼親戚宗族逃出者僅僅數人餘皆被困城中本官思欲滅逆酋以解彼倒懸蓋寢食不忘者也本道向任關西本官曾爲屬吏素知其才諳練達識略深沉可濟緩急之用茲因家屬避難保寧來迎赴任謁見本道與談永寧地形險要及逆酋生平伎倆瞭然如燭照數計若以之充軍前叅謀必能隨機應變好謀成功者也但係外省官員不便擅留儻就改蜀中縣令更易行事查得潼川州安岳縣見缺正官或將本官題補一面先令赴軍前聽用候事完之日到任則不惟帷幄有資而且

爲地方得一良有司實兩利之道也再照本官上世原籍巴縣頗有引嫌之意但今雲貴縉紳強半繫籍他省然僅屬空名耳與真正原籍不同卽如先年揚州府知府吳秀原籍蘇州府吳江縣人以南直人而爲南直官竝不迴避自有故例可援似不必於拘泥也相應呈請合無將本官題補安岳縣缺一面行令先赴軍前聽用等因呈詳到臣除批該道行令本官先赴軍前料理外該臣會同總督川湖雲貴等處軍務兼理糧餉兼制陝西漢中地方兵部右侍郎兼都察院右僉都御史張我

續巡按四川監察御史張論看得原任陝西岐山縣令
調江西石城縣知縣趙民戴雅有才名更多謀略不惟
關中令聞已爲該道稱許且本官產自永寧而彼中地
里險要逆賊情態尤熟見而稔知者茲留之以爲參謀
仍就近改補安岳縣令誠一舉而兩得之矣至本官先
世墳墓旣在永寧則入籍不爲不久卽是黔之編氓又
何拘巴縣之籍旣經呈詳前來相應會題伏乞勅下吏
部覆議上請將趙民戴改補安岳縣知縣聽於軍前參
贊機務候事平之日到任管事遺下江西石城知縣員

缺另行銓補行臣等轉行本官遵照施行地方幸甚爲
此具本謹題請旨天啓二年八月十一日具題奉聖旨
趙民戴准留用該省兵事方急各官有就近更置留任
的聽撫按官便宜行一面具奏事平照舊該部知道

議留陞遷邊關疏

題爲議留陞遷邊關以資保障事據整飭建昌兵巡糧儲道按察使諸允修呈據行都司操捕僉書陳廷對呈稱本職於天啓元年十月初四日推陞遊擊將軍管廣東瓊崖叅將事業已具詳請官交代呈蒙分巡上川南帶管建昌道趙副使轉詳督撫按三院俱蒙批令本職照舊在任料理候新官至日交代緣本職投筆從戎日夜鞍馬勞苦過度頭目昏眩痰火上攻莫能追逐恐悞地方又經請代呈蒙本道諸按察使批候新舊交代在

任調理但本職舊冬報轉業已三時卽今履任已屬後
期萬一違限職將誰控合無請乞轉呈三院俯念留任
效勞移咨廣東兩院知會庶道稽遲等情據此又據撫
苗通判張爾恕呈據越雋衛印巡經歷儒學四所指揮
千百戶陳其忠高起新何貞德方岳等呈稱建昌五衛
地方中通一線四面皆苗猺環繞近被奢酋叛亂安馬
二土司素聯親好聲勢相聞猖狂復起自小相嶺至建
昌儻非陳操捕運籌帷幄於中折衝禦侮於外一帶經
行幾已絕跡四方鄉村幾無煙火今相苗畏服不敢猖

獷者惟有陳操司坐鎮今一離任不惟近苗窺伺而糧
武無人或奢酋奔出而誰當一面官軍兵民大失所天
呈乞轉達遵照今陞官職加銜改鎮五衛庶官民永受
仁恩地方可保泰山等情又據本衛鄉官舉監通學生
員朱瀚許善王允龍等呈稱自奢酋倡亂五衛四奪
莫不心懷異念時時報警幸陳操捕文武全才德威並
用仁恩浹洽乎士卒英風雄鎮乎犬羊駕馭多方躬親
對敵經商賴以通行鄉民恃以無恐方幸保障得人豈
意喬遷立至儻奢酋由馬湖而出將何以當一面乎呈

乞轉達照新陞銜品坐鎮五衛庶主將得人長城有托
等情各呈到廳看得五衛地方一線通漢四面環苗頻
年藺苗歸順不過鼠竊狗偷近日藺逆大叛四奪乘風
劫搶安馬二司聲息相聞亦各狂逞復起自瀘南至相
嶺以及建昌等處警無寧日幸陳操司武緯文經多方
運籌百爲保障凡遇賊出單騎堵截奮勇交鋒進戰退
守保固無虞今報喬遷該衛各官鄉紳舉監生員軍民
舉保留任合無俯允備達將陳操司以陞轉職銜改留
五衛鎮守俾本邊生靈有賴等因呈詳到道該本道諸

按察使看得本官能文能武有勇有謀躬親險隘之區
不憚衝煙冒瘴調劑軍兵之苦何殊挾纊投醪地方藉
以救寧敵氛賴之稍戢今據儒學衛所及各士紳合詞
保留願爲借寇而本官又以舊冬報轉留任候代合無
俯順輿情或以新轉職銜仍鎮守地方等因通詳到臣
謹會同總督川湖雲貴等處軍務兼理糧餉兼制陝西
漢中地方兵部右侍郎兼都察院右僉都御史張我續
巡按四川監察御史張論看得建昌壤接滇雲羊腸一
線兼以瀘河相嶺之險番獯環伺不時出劫自操捕僉

書陳廷對蒞任以來才猷足以應變威望獨能折衝苗
獠畏威軍民懷惠地方倚賴正殷乃有粵東之轉故衛
所官民士紳合詞保留借爲屏障雖本官員缺已推補
壩陽守備劉范和但黔亂正熾料彼亦難離任且蜀苗
到處蠢動而建南尤爲喫緊防禦不可乏人旣經該道
議呈前來似應俯從衆願准其留任以竟厥施除批令
本官照舊任事外理合會題伏乞勅下兵部再加查議
覆請將陳廷對准以新陞遊擊照舊管理該司操捕事
務俟其再著勞績另加優擢其廣東瓊崖員缺與劉范

和俱另推補施行庶捍衛得人而羣情胥悅矣天啓二
年八月十一日具題奉聖旨兵部知道該本部覆奉聖
旨是

報遵義建武失陣疏

題爲塘報賊情事八月十一日據遵義府署印推官馮鳳雛呈稱七月二十一日午時准都司陳一龍手本移稱本月二十日申時據加銜守備羅天祐都正極等報稱十八日西賊阿烏迷等統兵數萬衝突腰營指揮蕭雪五等勢難應敵烏江路加銜都司陳文憲於本日督領祐等兵迎敵是夜劄營沙岡對壘十九日黎明賊兵圍營從寅至午砲矢俱盡逆賊先以馬兵三路攻擊至未時發兵四面重圍寡不敵衆衝散將陳都司扮小兵

葉胡子報稱被賊擄去等情馳報到職查得本月十四日陸續據各管塘報水西逆賊阿烏迷莫德阿能劉恩江之龍游朝炳鄭一顯等統賊兵數萬入犯內地抵水中澤林劄營於河梁莊離府城四十餘里又崖門路塘兵報蘭賊奢寅羅向宸羅文垣金保等統賊數萬找搭浮橋於大灣營落紅口桃紅灘渡江三路進取遵桐又據黃灘合口等關報稱湄潭逆賊王倫糾合苗仲聲言會合水藺叛賊取遵義桐梓長驅出川大舉該本職就經會同籌畫分布六路官兵堵截去後十九日寅時行

令加銜杜遊擊下千總趙甫等領兵一枝往烏江應援
外二十一日巳時准桐梓縣署印金主簿移稱十九日
據羅安良鄧朝用報稱苗賊扶國禎何龍袁應朝張登
榮石永正永安等統兵進大台謝軒穆昭曹廷禎統兵
進大壩四兵齊起扶賊已將小水寨老公墳熊家洞等
地方失陷又安鑾差守備劉華山馳迎水西號稱征南
大將軍頭目莫德進烏江阿烏迷進白蠟坎共五十四
營前進遵義立限送宣慰楊維新坐府復播卽便長驅
等情到府該本府看得水蘭兩賊此番之舉與前迥異

去歲九月占據府城止賊扶國禎與舊民楊維新爲主
兵止二萬一戰卽退今四路交通蜂擁竝進且元兇賊
頭自相督陣蓋逆賊窺我兵半染疫糧匱且無憲司彈
壓主將調度故散圍黔之兵渡江而來已得遵義徐及
他耳雖我兵四路分截俱空國僅沿門兵耳有何可恃
今沙溪營千總李春先連報賊兵已逼中莊離府僅止
五里勢甚危迫乞發援兵急救等情到臣批新疆再失
賊勢益披猖矣及今速援猶易爲力仰道星馳赴救併
催各將努力建功毋得稽緩事去後隨據分守川東

帶管遵義道右叅政吳國仕呈爲萬分緊急軍情事七月二十七日據千總劉朝賓稟稱賊兵暗地一擁四路而入各隘官兵盡退府城於二十三日五鼓先破馬坎屈朝宣一營次追石豬漕水賊勢大各兵死散任知縣屈守備駱土官於二十三日三鼓各單騎到綏陽縣馮推官陳都司鄧袁二經歷不知下落等情本月二十八日又據真安州稟稱二十六日申刻據守城管聽事官兵易朝國報稱二十二日叛賊圍城二十三日破城二十四日土坪張守備差人打聽報稱馮推官統兵殺出

在長灘劄營有票來沿途趕兵救急乞發援兵接殺事
在危急勢難延緩等情二十九日又據綦江縣稟稱二
十七日據署桐梓縣事主簿金文科稟稱遵義復陷據
旗牌成元慶報馮推官及綏陽任知縣同領兵在府敵
殺數日不知作何下落陳都司隻身到縣切照遵義至
綦五日之程綦江募兵因淪平撤去止存丁兵千餘乞
發兵堵截以免水藺長驅等情八月初一日又據真安
州稟稱馮推官墜城信真府印不知著落前發丁守備
解到接濟銀兩雖貯府庫俱被搶奪等情同日又據桐

梓把隘加銜守備婁攀鳳等稟稱馮推官未見出城止
任知縣奔出綏陽縣皆被攻劫小民不勝流離初二日
又據桐梓縣加銜遊擊趙文進報稱遵義攻陷幸馮推
官任知縣奔出今桐梓動搖金主簿亦難支持已移新
站職聞此卽嚴督各兵把守楠木洞官木崖奈兵無糧
似難鈐束各等情到道除行真安桐梓綦江南川各督
鄉勇把隘守城并行遊擊趙文進等屯兵緊關貓兒岡
等處堵截外該叅政吳國仕看得水蘭合謀分兵四路
攻陷遵義府城兼劫綏陽地方勢甚猖獗據報馮推官

或存或亡參差互異其潰而奔綏桐境者惟綏陽任知縣都司陳一龍守備屈朝宜土州判駱麟等官耳然道路阻絕聲息不通各官兵陣亡損傷名數及逆賊據城殺擄情形杳無確報業分差的當員役前往偵探逐一查明的實另報外惟是我師敗衄之餘無一足恃而真安綏桐間人情洶洶相率逃竄署桐梓縣金主簿退至新站兵寡勢孤岌岌可虞乞速遣大將發兵數萬分布堵截萬一諸寇乘勝長驅震驚內地將何抵敵以挫賊鋒哉本道代庖無能礪鈍罔效近奉部院督餉之委移

駐南川方理運務而警報猝至孤城遽陷旣乏預防之策難追失事之辜乞另簡賢能署理庶安攘有賴等因呈詳到臣又據叅政吳國仕塘報八月初八日據桐梓縣署縣主簿金文科報稱差人偵探賊情難以入境忽府城被擄人逃出報稱楊維新坐府撫安舊民衙門人役及新民男子不問老少一槩盡戮婦女發入水西又據真安州土州判駱麟報稱水西賊兵退回巢穴遵義府惟楊維新安鑾竊據城中於小清溪劄兵七營聲言俟扶國禎到日要下真安等因又據該道報稱推官馮

鳳雛在府遇賊相抗被賊刺死等因到臣又據叙州府
安邊同知辜志會報稱卑職於七月初九日督建武加
銜遊擊龔萬祿兵進剿藺賊由得抗堡中鎮界牌一路
俱有通苗小徑關防無虞龔萬祿慮兵愆期由界牌進
劄耳記山四旁皆苗地連日阻雨天陰霧障不謂賊勢
縱橫於本月十八日黎明時分四路攻圍先衝李一山
營次衝龔萬祿營賊兵既多主客不敵衆兵奔潰龔萬
祿聞衝出營不知去向一路攻平寨欲抵界牌中軍盧
世卿加銜都司周良材等兵合營與賊對敵卑職慮建

武失守抽兵防禦乞發兵應援等情到臣隨牌行本官
備查龔萬祿果否與賊交戰失利卽今官兵在於何地
劄營一面查明馳報一面分布要隘據險屯營堅壁防
守俟大兵齊集進剿其陣亡損傷官兵據實開報去後
至八月十三日據同知辜志會回稱龔萬祿督率建武
三路官兵始於界隈紮營防守十四日移劄耳記山相
機進剿時值天雨霧障四旁皆苗地十八日黎明奢賊
乘雨衝突腰營次衝龔萬祿營官兵與賊拒敵傷死苗
兵千餘不意苗衆分兵七路夾攻以致失利龔萬祿手

殺賊兵四人身被重傷墮坑而死第五男龔崇學亦亡
第四男龔崇勝自爲一營與賊堵截親殺賊兵三人力
殫走脫時卑職駐中鎮見各兵潰敗賊勢縱橫恐城池
失守抽兵回所既至而軍民逃竄城虛無人卑職督加
銜遊擊千戶周瓊加銜都司周良材加銜守備黃文明
招集逃兵一千四百員各見在守城又李應貴等官兵
共計三千一百二十七員各分布城外要路劄營防
守其陣亡未確前不敢卽報今督陣指揮王昌明自賊
營逃回查實陣亡領兵各官龔萬祿下加銜都司袁朝

華加銜守備劉尚義汪奇雷永祖李容潘尚德彭勝毛
倫王宗舜徐茂林并總鎮紅旗手高國朝朱和與建武
所隨征千戶郭良臣賈應祿并征兵包忠等俱陣亡又
加銜守備李大貴加銜指揮曾定國等被賊擄去生死
未期等情到臣謹會同總督川湖雲貴等處軍務兼理
糧餉兼制陝西漢中地方兵部右侍郎兼都察院右僉
都御史張我續看得遵義新疆去黔咫尺與水藺爲隣
自驅逐藺賊扶國禎等恢復之後賴都司陳一龍整頓
料理集兵數萬且周圍布營見謂可守乃本官以援黔

出府而以加銜叅將周之德代理其事先是屢告乏餉業已兩次發銀二萬兩解濟近報歲旱無收兵多疫癘臣等方慮逆賊乘隙窺伺屢檄戒嚴詎意黔師失利突被水西賊目莫德阿烏迷等擁衆五十四營與蘭賊合謀併攻遵義立舊民楊維新以爲復播之舉而染癘之卒衆寡不支旣陷府城復劫綏陽今桐梓真安等處亦有纍卵之危推官馮鳳雛仗節義死難但我兵敗屺之後賊勢益張萬一乘勝長驅蜀事有不忍言者矣守東道叅政吳國什代攝遵義道務近又委令督餉駐劄南

川地頗隔遠應援無及與周之德等俱候另議至於建武加銜遊擊龔萬祿進營耳記山者蓋欲趁楊愈懋之約也奈何本官不察降苗之詐偽收入營中致墮狡計各賊遂乘霧衝營降苗內應雖彼此殺傷相當然兵多奔潰龔萬祿父子與袁朝華等俱各陣亡此皆臣燹元治兵無術致有挫損謹席藁以待除行該道并檄副總兵龍萬化叅將祁繼祖督兵前赴綦江等處相機堵截召集兵勇另圖驅逐及令叅將張邦絃前赴建武會同遊擊范繼道等協力固守建武長寧等處要隘以防攻

敘併俟大兵齊集進剿死事官員馮鳳雛等候查明確
另疏議卹外臣等所慮者不在兵而在餉近議進搗蘭
巢需兵二十萬日費餉銀六七千金目今匱乏屢屢脫
巾加以遵義之變益費支持日夜焦思計無所出仰祈
皇上軫念蜀勢阽危兵餉匱竭慨發帑金五十萬星馳
解蜀接濟以救然眉更乞勅下該部速選大將勒限前
來督兵剿賊仍行滇楚二省急救黔困以牽賊勢庶黔
苗不致鼎足爲窟而蜀黔氣脉可得流通地方幸甚臣
愚幸甚天啓二年八月十五日具題奉聖旨川貴救援

事急這所奏兵將糧餉并卹錄等事已有旨了朱熹元
著用心調度務收成功該部知道

請將發帑救急疏

題爲羣苗交煽蜀禍難支敬陳迫切情形仰祈聖明命將發帑速救卹危事竊惟藺賊之敢於狂逞其蓄謀原非一日而諸苗與之同類惟賄是貪初猶謂奢社輝母子忠順無二近且驅道府殺諭官決無回心之望其餘各苗悉以水西爲領袖連鷄之勢既定封豕之毒彌張故蜀與黔有一處戰勝則相結益深有一處不利則狂逞彌甚或乘雨霧之朝或伏深林之內伺我之疎突然而出今江門建武屢屢挫損而遵義府城又且再陷臣

受皇上重寄以全蜀之大不能滅此小醜又不幸而危病纏身卽立就誅殛猶有餘罪顧惟用兵所恃者將耳皇上眷念西土遣楊愈懋杜文煥薛來胤三大將入蜀乃愈懋憤而中伏來胤怯而違令文煥又以患病放舟東下有將如此反貽賊笑耳計兵數西起建武東至遵義在冊者共十五萬每月卽需十五萬餉司帑之匱乏地方之殘破臣前疏已明天啓二年額糧業奉旨停免所恃者帑金耳督臣張我續開數到臣前後蒙皇上允發九十五萬或扣兌各省或延捱未解其到蜀者止二

十六萬六千四百二十兩此卽兩月不足支况延推一
載乎臣力非刺虎計難點金惟以忠義二字鼓舞各將
士計圖異日酬賞而久之人情自懈法令難施七尺之
驅何敢自愛獨恐爲封疆誤耳且蜀之財賦什九供邊
今公藩威茂建南建武遵義等處兩年缺餉一百餘萬
旣欲寬之民間又不能得之內帑非惟外患難防抑且
肘腋生變自非萬分危迫安敢妄顧惟望皇上垂念西
南半壁係天下安危速檄楚粵撫臣各提重兵蚤救黔
禍一面依臣前請慨發帑金五十萬差官徑解蜀省務

到軍前實用仍勅兵部立選才望大將一員主蜀兵柄
黔平則蘭賊必擒蘭滅而黔禍亦殄此唇齒相依之勢
而轉亂爲安之急著也至於微臣才劣病危屢次陳乞
萬非得已伏望蚤賜處分臣死無恨臣不勝迫切仰籲
之至天啓二年八月十五日具題奉聖旨這奏內已發
帑餉有扣兌併延捱未到的著作速催解餘已有旨了
該部知道

就近陞補重慶正佐疏

題爲渝城新復郡守需材乞賜就近陞補以濟時艱事
竊照重慶爲川東劇郡錢穀政刑冠於全蜀自非高才
卓識未易料理且自殘破之後城市爲墟野草荒燐蕭
蕭滿目鴻鴈之哀鳴未輯豺狼之出沒無常所賴郡守
噢咻休養奚啻拯溺救焚該府知府岳具仰因病乞休
督臣具題加銜致仕以馬湖府知府鄭朝棟調補員缺
極稱得人但叙馬一帶警報日至已委督府屬蠻苗沐
川四司土兵就近防守建武搗巢擒賊各兵相依爲命

勢不能舍此就彼似應照舊爲便該臣會同總督川湖雲貴等處軍務兼理糧餉兼制陝西漢中地方兵部右侍郎兼都察院右僉都御史張我績巡按四川監察御史張論查得重慶府同知余新民英猷天植苦節性成險阻艱難備歷疾徐甘苦能調衆望攸歸羣黎愛戴且資俸久已及瓜程材應當優轉合將本官陞補本府知府以慰民望其同知員缺卽以墊江縣知縣加銜本府同知劉國藩改補俾二官勵精整理加意撫摩使垂絕之民復有起色極敝之郡再覩太平則一轉移間地方

太有裨益矣理合會題伏乞勅下吏部再加查議覆請
將余新民陞補本府知府劉國藩改補本府同知遺下
墊江知縣員缺另行銓補勒限前來任事仍行臣等轉
行二官遵照施行軍民幸甚殘疆幸甚天啓二年八月
十五日具題奉聖旨吏部知道該本部覆奉聖旨是

報總督移鎮辰沅疏

題爲督臣移鎮蜀勢不支仰祈聖明命將給餉蚤爲振
救併乞憐臣危病速賜禔斥以無誤封疆事臣惟蘭賊
之變於茲一載賴督臣張我績爲政攻戰驅逐粗有頭
緒而不意本年八月二十九日奉命救黔改鎮辰沅大
旆一移人心洶洶竊惟近日事勢水西諸土苗交起助
虐賊有翼虎之勢我當强弩之末視之太易爲之益難
欲清蜀寇必須會集各省速救黔禍蓋諸苗惟聽命於
水西水西帖而四省俱無虞也蜀之救黔必須由遵義

蓋遵義距平越不過三站實水之左肘苗之後戶旣斷其交通之路又阻其衝出之念一舉而兩利也乃遵義道臣經年虛位新補僉事趙邦清該督臣題改川北尚在候旨未任雖經督臣檄鄉官副使王景暫停巡視往監軍務乃自四月與臣相別八月尚在南川鞭雖長其及馬腹乎水西阿烏迷等數萬衆業已退去乘人心未附流離思返之日命將激衆鼓行而前新疆之勢可以復振且咫尺平越聲息相通水旣懼逼藺且顧巢策之最急者也顧此非可託空言必須有將有糧有精銳敢

戰之卒而又總理分理各專一局庶可以委任而責成
功今三大將一遇害二患病去矣新委副將龍萬化痿
瘓不起矣監司三奉差五告病矣獨叅政吳國仕入南
川副使李仙品割納谿監軍僉事劉可訓入長寧建武
且此千餘里內賊衝出大道有九而曲徑小隘不下百
餘處安能一一設防况三邊荷戈之士缺餉二載數至
百有餘萬而見集江干戰卒十有餘萬正當喫緊之會
絕無分銀可支報警告饑紛如雨集臣欲徑趨遵義則
叙瀘一帶賊船已成皆謂臣避衝而就僻臣欲專駐叙

南則東南下流日夜報急又謂臣圖近而舍遠臣自四月至今每見推官馮鳳雛求救之文哀哀切切未嘗不泣然流涕而有心無力竟不能庇臣罪深矣今臣卽拚死而鬪不能殺數賊割肉以啖不足飽數人無奈糜腫支離病魔日益飲食旣減咯血不休且暮之死人可復令詰兵戎圖戰鬥乎伏望皇上勅下吏戶兵三部將臣議罪僞斥速簡才望前來任事併選廉勇大將立與限期責成討賊至臣前請帑金五十萬伏乞允發徑解軍前務裨實用楚中兗解餉銀仍令蚤解內有分蜀二十

萬兩近奉綸音黔蜀通融但蜀中勒兵候餉專望此金
爲命併乞勅諭全解入蜀接濟地方幸甚臣病語無倫
萬非假飾天啓二年九月十三日具題奉聖旨蜀寇未
平朱爕元正宜盡心防剿以竟前勞豈得屢辭餘著該
部作速議奏

縣令給由疏

題爲遵例考覈給由官員事據四川布政使司呈奉臣
批據新津縣申准本縣知縣向君化關稱見年三十一
歲湖廣荊州府松滋縣人由舉人萬曆四十一年三月
內除授本省衡州府安仁縣儒學署教諭四十六年九
月內陞今職四十七年六月初一日到任扣該天啓二
年五月初一日連閏歷俸三年任滿例應給由照詳奉
批仰布政司查報奉此行准按察司守巡各道咨牒回
稱查得本官委於前項年月日期到任歷俸考滿任內

徵收錢糧清勾軍伍積貯稻穀五事實政俱已足額修
舉委官盤量無異應准給由各開具稱職詞語起送到
臣卷查先准都察院咨爲酌議考課之法以肅吏治事
准吏部咨內開今後府州縣正官給由免其赴京聽撫
按官從公考覈賢否具奏先令就彼復職管事牌冊差
人齎繳其稱職經薦應得誥勅命者照例請給其平常
不稱職者部院會同酌處又准吏部咨爲酌時宜陳愚
見等事內開遇有方面有司官考滿從公考覈據實直
書分別稱職平常不稱職三等填註考語具題給由以

憑本部議處又准都察院咨爲治平要務急在保民等事內開省直撫按遇郡縣各官考滿總將三六九年修舉過五事實政覈實造冊定稱職平常不稱職之差等另報部院各等因題奉欽依備咨通行在卷今據前因該臣會同巡按四川監察御史張論考覈得新津縣知縣向君化心鏡光明案琴清亮應變兵民共適恤疲間井騰驩本官職業俱修考居稱職除批令帶俸管事任內行過事蹟徑自造冊差人齎繳五事冊揭行令咨送部院外理合具題伏乞勅下吏部將知縣向君化再加

考覈酌議題覆施行天啓二年九月十三日具題奉聖
旨吏部知道

塘報各路賊情

爲塘報賊情事九月初五日據加銜副總兵鄧懋官塘報拿獲細作吳四供稱奢酋約四苗府齊反差奸細往省探聽等情又據敘瀘道副使李仙品塘報奢寅調各寨苗賊到紅崖點驗分付各造長槍大弩令到卽行又取碗盤於龍場壩與水西諸目會酒刻期攻出又分布僞總兵先鋒楊侯等十餘人率兵四下劄營聽令烏撒安効良領兵三千左耳帶鑲劄於城內日與酋父子飲酒揚言只在九月內分布僞總兵胡宗祿樊虎阿弟出

建武長寧每兵隨帶船板一塊至橫江釘舟過河攻叙
府符國禎九兒統兵出遵義傅紀羅舒成朱國恩統兵
出中箐海底九枝奢寅諭訓徐應倫出爐烟三漕有小
船數十隻下河又差頭目山人張遇高等由烏蒙芒部
去建昌借兵接應攻叙府又差人去水西芒部傳云朝
廷起兵幾苗府一同要征惑他同叛又將孩子剃頭作
挖去差人約反誑示諸苗初八日又據叙瀘道李副使
稟報納谿點兵安祥只苦一二月無餉告討之文一日
三至又據筠連縣稟報鎮雄女官離府治而割古芒部

又來角壘巖脩寨逼近吾土所云西烏迫脅內應又據副總兵金汝佐報稱援黔東行乞行委官防禦又據合仁路塘報官楊元報云本路主將周基命奉取援黔舟行三軍泣送本營無主偏裨辭去兵士多逃糧餉久匱又據川貴叅將張邦紘稟報連日警報時傳浮言日至六鄉之焚劫可駭對山之號火可疑各營探聽奢賊日逐點兵分投出犯兩日之間奔潰者禁之不止令之不行賊偵建武無兵無餉長驅而入不獨建武不支事尚未可知也初九日又據合江越同知報稱賊已造船長

江之險與我共有又見杜總兵東下有司官俱去大半
過江又據綦江知縣鄒昌魯稟報綦江與蘭賊兩隣副
總兵龍萬化右癘見告武昌道張副使爲制臺下楚回
渝祁叅將亦奉撤去其孔叅將黃守備皆接踵東下兵
士不免以無將渙散解體且無餉脫巾而呼在旦夕間
又據武昌副使張季稟云茲請部院不日東下未能躬
辭乞蚤委監軍道速至綦江初十日又據叙瀘道稟云
趙壩各營兩月無餉兵士哭訴劉養鯤以米七包均之
人得數粒銀無分毫真然眉之惡十一日又據越同知

報初四日忽見吳從教蔡貴家火起各山劄兵千餘各將兵少皆失色賊將舒廷彩羅舒成統兵劄巡檢壩將劉坤父子殺死房屋盡燒隔江對劄四路居民奔逃又據帶管遵義道叅政吳國仕稟稱逆賊羅向宸僞牌招降助叛且云水西同知魯仲賢督兵三十營議攻桐梓取綦南重慶知我內地撤兵單弱缺餉欲逞長驅之勢又據長寧叅將范繼道親手書塘報內云本月初六日據塘報張龍於賊中偵得外面劉鄉官將火藥裝放布網鹽包內於各路送進叫內打船率眾攻叙官兵回救

卽順流直下南京出其不意進京占據劉爺合會鎮江沙上好漢數萬爲應賊父子卽傳一個頭人要船一隻有湖廣木匠姓劉者三人回言要下去的須麻柳木板打造別木沉重不可當被殺死等情此言未知真僞有聞不敢不報又一帖報據長寧路塘報本月初七日有趙登林偵報賊胡宗祿於本月初十日點兵十三日出長寧焦罵色劄營麻糖坎阿弟出江安逆寅父子備船三十號出納谿水西助兵十七萬鎮雄助兵三萬共攻叙府各等情到職除飛檄各路相機堵剿憑險據隘固

守四下策應禁絕鹽布及權行布政司暫議徵銀米接濟一面差人催解帑金十萬楚帑四十五萬及再疏請將請餉請斥外天啓二年九月十三日塘報兵部

降將立功

爲降將立功已著被害情慘據實咨請授銜紀錄以示鼓舞事先是職念四方遊手奸徒咸入永寧撥置且蜀中勁兵皆在永寧非用間鼓舞不可招徠自羅乾象范祖文胡肇虞鄒蔚然胡汝高胡汝寧等擬以蔡遊入疏後卽令守備劉養鯤率衆前抵賊界相機用間曉以禍福授以名色爵祿招撫於是貴州舉人胡纘携家來見備述賊情職卽令與劉養鯤等隨宜設間又發諭帖與蔡遊守備劄付使之潛入賊部曉諭而賊之僞大將軍

宋武僞先鋒虎將張令遂遵諭縛賊相何若海併文武
二印來歸又有僞總兵叅遊郎中鄆价秦國俸朱朝爵
等十餘人見乾象輩受爵效忠相率奉諭各帶勁卒來
歸於時永寧人心無不思漢原任松潘道李叅政三次
密稟到職會同胡肇虞父伯叔胡稱寧稱藩稱臣三家
各捐千金募力士何枝等三十七人爲首候大兵壓境
卽內應殺賊總兵楊愈懋駐兵納谿探知情狀聽細人
羅鳴之言輕騎直入欲乘機擒酋以報朝廷乃酋糾水
西烏撒惡苗埋伏竊發頓爾挫衄而前謀被人首發賊

遂屠叅政李忠臣之門再屠胡稱寧三家斬殺無遺妻
女配諸苗目併殺力士何枝一時籍沒殆盡掘拋羅乾
象胡纘歷世祖塚盡抄其家范祖文父母妻女驅配裔
首沒其家產二弟以身免逃出胡汝高等亦復如是情
景之毒殊不可聞各官亦惟捐此生報國除兇有不與
賊俱生之念况忠義之士尚多招徠之方宜廣又有材
官冉世烘畢應台范寵劉誥指揮葉達枝百戶夏才志
嚴討賊儘可策勵相應以宋武張令授以副將鄆价秦
國俸朱朝爵朱一龍胡綬雷應龍王繼先王心一授以

叅遊冉世烘夏才范寵畢應台劉誥葉達枝授以守備
閔侍孔陳大臣授以指揮俱題示虛銜鼓舞不獨勸其
擒僞相之功信欽賞之格實馭材將之術亦當如此其
舉人胡縵賊未發難已抱杞憂兩省條陳可據及賊圍
省結盟士庶圖掃巢穴不虞酋敗奔回身親三木幾死
囹圄購金逃出與劉養鯤等拮据招徠擒賊一切盟知
咸來歸漢永寧外四里悉爲歸順功苦俱著當與羅乾
象胡肇虞范祖文胡汝高胡汝寧鄒蔚然等俱紀錄登
簿事定從重酬慰者也但非顯疏風示無以激勵人心

合咨本部煩爲述疏具題頒劄行職轉行各官遵照仍
揭示賊巢以示儆儻亦一時鼓效之機也天啓二年九
月十三日咨兵部該本部題將宋武張令各加叅將鄧
价秦國俸朱朝爵朱一龍胡綬雷應龍王
各加遊擊將軍冉世烘畢應台范寵劉誥
各加守備其閔侍孔陳大臣量加把總各
付從軍征剿報效奉聖旨是